
РОССИЯНИНГ УЗОҚ ЯМАЛО-НЕНЕЦК АВТОНОМ ОКРУГИДА ВАТАНДОШЛАРИМИЗ УЧУН МУСТАҚИЛЛИК БАЙРАМИ ШОДИЁНАЛАРИ ТАШКИЛ ЭТИЛДИ

Давлатимиз Раҳбарининг ташаббуси билан хорижда яшаётган ва меҳнат қилаётган ҳамюртларимиз билан бирга халқимизнинг энг улуғ, энг азиз айёми – Мустақиллик куни байрамини биргаликда қутлаш учун Россия Федерациясида бўлиб турган Фарғона вилояти делегацияси аъзолари Ямало-Ненецк автоном округида жойлашган Янги Уренгой шаҳрида ватандошларимиз билан учрашдилар.

Саноатининг катта қисми нефт ва газ қазиб олишдан иборат бўлган ушбу шаҳарга 1970-1980 йилларда Тюмень нефтини қазиб олиш чоғида асос солинган.

Ташриф жараёнида вилоят делегацияси шаҳардаги йирик нефт ва газ қазиб олишга ихтисослашган “Эриэлл нефтегазсервис” компанияси фаолияти билан танишди. 3800 нафардан зиёд ишчиларга эга бўлган корхонада маъмурий ва ишчи ходимларининг кўп қисмини ўзбекистонлик, хусусан фарғоналиклар ташкил этади.

“Eriell Group” халқаро нефт конларига хизмат кўрсатиш компаниясининг Янги Уренгой шаҳридаги бўлими 2008 йилда ўз фаолиятини бошлаган. Аввал бошида 2 та бурғулаш ускунаси билан иш юритган бўлсак, ҳозирга келиб ускуналаримиз сони 30 тадан ошди. Бизнинг асосий вазифаларимиздан бири ходимларга яхши шарт-шароитларни яратиб беришдан иборат. Шунинг учун ходимларимизнинг турар-жойлари ва озиқ-овқатлари таъминоти алоҳида эътиборда. Корхонамизга келадиган янги ходимлар билан ишлашда аниқ бир занжирсимон тизим йўлга қўйилган. Унга кўра ходимлар Россияга келишларидан бошлаб уларни кутиб олиш, базага жойлаш, зарур озиқ-овқат билан таъминлаш, ҳужжатларини расмийлаштириш, автомобил, вертолёт ёки самалётлар орқали уларни тегишли ҳудудларга жойлаштириш ишлари компаниямиз томонидан амалга оширилади, Бугун Фарғона вилояти делегация билан мустақиллигимизнинг 30 йиллигини тантана қиляпмиз. Албатта, бундан ёзи жуда қисқа, совуқ ҳаво йил давомида ҳукмрон бўладиган жойда, ўз оила-аъзоларидан узоқда меҳнат қилаётганларнинг қувончлари чексиз. Улар Президентимиз, ҳукуматимиз эътиборида эканликларини яна бир бор чин юракдан хис этишмоқда”, - деди корхона директори Икром Юсупов.

Шу куни корхонада хориждаги ватандошлар иштирокида ўтган байрам тадбирида Ўзбекистон Республикаси Бош вазири маслаҳатчиси Меҳриддин Хайриддинов, Ўзбекистоннинг Россиядаги фавқулодда ва мухтор элчиси Ботир Асадов, Ўзбекистон Республикасининг Екатеринбург шаҳридаги бош консули Абдусалом Хатамовлар ҳам қатнашди. Сўз олганлар бугун ижтимоий тармоқлар орқали ҳам кўплаб хорижлик юртдошларимиз Ўзбекистондаги ўзгаришларга, ислохотларга гувоҳ бўлаётганликларига, шунингдек, чет элдаги фуқароларимиз доимо эътиборда эканликларини таъкидлашди. Байрам билан ҳамюртларимизни табрикладилар.

Тадбир катта концерт дастури, байрам шукуҳи билан тўлган рақслар билан давом этди. Тадбирда элимиз ардоғидаги сеvimли хонанда Абдужалил Қўқонов, «Наво» гуруҳи, «Қир гуллари» рақс жамоаси, шунингдек, бир қатор ёш ва умидли санъаткорлар ўз чиқишлари, қўшиқ ва рақслари билан йиғилганларга байрамона кайфият улашдилар.

Ватандошларимиз ҳамда маҳаллий меҳмонлар учун миллий таом – палов тортилди.